

現代生活藝術系列

華嚴經疏論纂要

44

——升兜率天宮品之一

華藏淨宗學會印贈

大方廣佛華嚴經疏論纂要卷第四十四

五臺山清涼國師澄觀疏鈔

太原方山長者李通玄 論

閩鼓山私淑比丘道霈纂要

升兜率天宮品第二十三之一

○自下第五會。明上賢十向。四門同前。初來意。

疏來意中。先會來者。正爲答前廻向問故。廻前解行。以向真證。廣益自他。令行彌綸無不周故。菩薩大乘藏經云。以少善根引無量果者。謂廻向心。以廻向心爲大利故。故行後明之。又前解行旣著。令

悲願彌博。後品來者。前會既終。將陳後說。先明說處。表法故來。

○二釋名

疏釋名者。先會得名。亦有三義。同前二會。

鈔亦有三義者。

一約處。名兜率天宮會。二約人。名金剛幢菩薩會。三約法。名十迴向會。

一一釋品名。兜率是處。佛以法界之身。不起而應。故名爲升。處此

說者。表位超勝。是次第故。又上下放逸。此天知足。表世間行滿。故居喜足之天。又以彼有一生補處。表菩提之心。功行滿故。又積功累勳。知階未足。迴勲授子。乃知有餘。菩薩亦爾。勤苦積行。未見有餘。

廻向衆生乃知自足。又欲界六天此居其中。表悲智均平處於中故。又生此天而修三福。謂施戒定自餘不具偏多不均。故處此說也。

○第三宗趣

疏宗趣者。會以十向大願爲宗。得地爲趣。品以升天赴感爲宗。說向爲趣。

論第五會兜率天宮說十廻向法門。於此會中序分。正說流通者。從此初升兜率天宮是序分。已下兩品。是正說分。兩品中。至下動地興供。是流通分。於此位中。有二品經。共成此位。第一從初升兜率。

天宮品。三義如前。一釋品名目者。以升天所至立名也。兜率天者。此云樂知足天也。二釋品來意者。明前十住十行二位。以彰出世已成。如來智慧之業。今於此天。以明隨見道者。成如來大悲處。世利生之業。會融世間出世間。不一不二法門。是故此品須來問。云何於此天處說廻向法。答曰。如須彌頂上說十住。明初生佛家。住佛智慧之頂而無退動。夜摩天上說十行法。表行依法空。一切無著。至此兜率天宮。表雖不離欲界。處大悲門。而於欲境常行知足無所染著。但爲饒益衆生。處於世間。又

此天處於欲界。自須彌已上五天之中。以會智悲。
令不偏故。是故而於此天說十廻向明和會真俗。
成大慈悲。長處生歟而不廢涅槃。名爲廻向。從初
發心住已來。如是和會位終。偏得其名。故名廻向。
此爲以處。表法升進。亦卽不曾身有上下去來。智
悲恒徧故。無中邊故。但明寄處。表一生菩薩處。此
天中果行滿故。以明發心初始生如來智慧之家。
以佛智慧行大悲門。卽是圓滿如來果故。果復常
滿。行復常行。果行相嚴。故號佛華嚴也。十地。十一
地。依此十住十行十廻向三法成其功用。更亦無

別安立。以是化天中說十地時。更不別作法事。興供。但長養此位大智大慈大悲。令深固圓滿故。

○第四釋文。此會有三品經。初二當會由致。後一正說。所以無勝進者。由二義故。一以此會是三賢位終。攝前解行。總爲趣地方便。廻向當體。自是勝進。是故無也。二方欲入地。必離進趣相。與無分別爲方便故。就初二品。前一化主赴機。後品助化讚佛。今初品中。大分十段。一本會齊現。二不離而升。三見佛嚴處。四迎佛興供。五覩佛勝德。六請佛處殿。七如來受請。八天王獲益。九

承力偈讚。十如來就座。今初

爾時佛神力故。十方一切世界。一一四天下闍浮提中。皆見如來坐於樹下。各有菩薩承佛神力而演說法。靡不自謂恒對於佛。

疏初言佛力。卽是徧因。未必起神境通。但是修成心自在力。十方已下。辨所現相。於中亦有化主助化。望第四會。旣加及須彌頂。此亦應云坐於樹下。及須彌夜摩天宮。文無者畧。以第二段中帶前升後。旣全舉前四。則影顯前四。皆圓徧也。而演說者。亦通四會之所說也。

○第二明不離而升

爾時世尊復以神力。不離於此菩提樹下。及須彌頂。
夜摩天宮。而往詣於兜率陀天。一切妙寶所莊嚴殿。
疏謂前十方一切處四會。皆儼然不散。而升此說。
意明橫徧十方。豎該九會。佛法界身。徧時處故。餘
義具如第三會初。

論云。不離菩提樹而升夜摩兜率天者。爲菩提智
體。性無依住。徧往十方。無去來今。性無可得。無有
住處。無有遷變。不動不寂。無所造作。而隨根普應。
於十方世界。一切衆生前。對現色身。如應化度。

○第三見佛嚴處文二。初明感應緣會。二。卽於已
下。正顯嚴處。於中分二。先明一方嚴處。後結通
十方。今初。初雖標座。下列樓帳等。皆兼處嚴。文
分爲二。初總顯體德。後有百萬下別明體用。今
初

時兜率天王遙見佛來。卽於殿上敷摩尼藏師子之
座。其師子座。天諸妙寶之所集成。過去修行善根所
得。一切如來神力所現。無量百千億那由他阿僧祇
善根所生。一切如來淨法所起。無邊福力之所嚴瑩。
清淨業報不可沮壞。觀者欣樂無有厭足。是出世法。

非世所染。一切衆生咸來觀察。無有能得究其妙好。

疏有十一句。初總餘別。總中無盡大願。隨意出生。

悲智必俱。生死無染。名摩尼藏。展行彌布。故有敷

言。別有十種圓滿勝相。以斯妙座實德成故。初一

自體相。以寶成故。次六因相。一深遠相。二勝妙相。

三廣大相。四同體相。五具德相。六堅固相。後三總

顯殊特。卽座之德用。一端嚴故。二離染故。三無極

故

論時兜率天王遙見佛來者。明從前十行位。向十
迴向。爲遙見佛來也。

○二別明體用中。通有三百零有二種百萬億。廣上三段。卽爲三別。初廣自體。次有百萬億。初發心下。廣前殊特。三百萬億善根下。廣前因相。初一多明器世間嚴。後二顯衆生世間嚴。皆智正覺世間之力也。皆言百萬億者。位增十行之百萬故。初中長分爲十。前九色相嚴。後一音聲嚴。其一二嚴事。皆卽法門。可以意得。第一有十句座體嚴。

有百萬億層級周帀圍繞。百萬億金網。百萬億華帳。百萬億寶帳。百萬億鬘帳。百萬億香帳。張施其上。華

鬘垂下香氣普熏。百萬億華蓋。百萬億鬘蓋。諸天執持四面行列。百萬億寶衣以敷其上。

疏於中初句辨座層級。後九覆座之嚴。雖四面行列。執蓋亦爲覆座。

○第二十句復於殿內建立樓閣繞座莊嚴。亦是嚴處。

百萬億樓閣。綺煥莊嚴。百萬億摩尼網。百萬億寶網。彌覆其上。百萬億寶瓔珞網。四面垂下。百萬億莊嚴具網。百萬億蓋網。百萬億衣網。百萬億寶帳網。以張其上。百萬億寶蓮華網開敷光榮。百萬億寶香網。其

香美妙。稱悅衆心。

疏於中初句總下九句別顯嚴閣

○第三十句辨帳嚴

百萬億寶鈴帳。其鈴微動。出和雅音。百萬億栴檀寶帳。香氣普熏。百萬億寶華帳。其華敷榮。百萬億衆妙色衣帳。世所希有。百萬億菩薩帳。百萬億雜色帳。百萬億真金帳。百萬億琉璃帳。百萬億種種寶帳。悉張其上百萬億一切寶帳。大摩尼寶以爲莊嚴。

疏帳嚴亦是統座。前已辨覆故。若重辨者。帳上建樓。樓上覆帳。重重無盡耳。

○第四有十一句辨嚴座身

百萬億妙寶華周市瑩飾。百萬億頻婆帳殊妙間錯。
百萬億寶鬢。百萬億香鬢四面垂下。百萬億天堅固
香。其香普熏。百萬億天莊嚴具瓔珞。百萬億寶華瓔
珞。百萬億勝藏寶瓔珞。百萬億摩尼寶瓔珞。百萬億
海摩尼寶瓔珞。莊嚴座身。百萬億妙寶繒綵以爲垂
帶。

疏其頻婆帳應在寶華之前。類例穩便。亦可二句
辨帳。九句嚴座身頻婆者。此云身影質。謂帳莊嚴
具中。現外質之影故。

○第五有十七句亦嚴座四周

百萬億因陀羅金剛寶。百萬億自在摩尼寶。百萬億妙色真金藏以爲間飾。百萬億毗盧遮那摩尼寶。百萬億因陀羅摩尼寶光明照耀。百萬億天堅固摩尼寶以爲窓牖。百萬億清淨功德摩尼寶彰施妙色。百萬億清淨妙藏寶以爲門闈。百萬億世中最勝半月寶。百萬億離垢藏摩尼寶。百萬億師子面摩尼寶。間錯莊嚴。百萬億心王摩尼寶所求如意。百萬億闇浮檀摩尼寶。百萬億清淨藏摩尼寶。百萬億帝幢摩尼寶。咸放光明彌覆其上。百萬億白銀藏摩尼寶。百萬

億須彌幢摩尼寶莊嚴其藏

疏嚴座四周皆明妙寶以爲窓門及覆亦嚴座體。以莊嚴其藏是蓮華藏故標中表法有異住行。不言蓮華理實應有或是座身之龕名藏

○第六十二句瓔珞周垂嚴

百萬億真珠瓔珞。百萬億瑠璃瓔珞。百萬億赤色寶瓔珞。百萬億摩尼瓔珞。百萬億寶光明瓔珞。百萬億種種藏摩尼瓔珞。百萬億甚可樂見赤真珠瓔珞。百萬億無邊色相藏摩尼寶瓔珞。百萬億極清淨無比寶瓔珞。百萬億勝光明摩尼寶瓔珞。周而垂布以爲

莊嚴百萬億摩尼身殊妙嚴飾百萬億因陀羅妙色寶

疏其摩尼身下二句文似闕畧謂因陀羅妙色寶下無所結屬又非下之香類不可別爲一段

○第七有十六句以香爲嚴

百萬億黑栴檀香。百萬億不思議境界香。百萬億十
方妙香。百萬億最勝香。百萬億甚可愛樂香。咸發香
氣普熏十方。百萬億頻婆羅香普散十方。百萬億淨
光香普熏衆生。百萬億無邊際種種色香。普熏一切
諸佛國土永不歟滅。百萬億塗香。百萬億熏香。百萬

億燒香。香氣發越普熏一切。百萬億蓮華藏沉水香出大音聲。百萬億遊戲香能轉衆心。百萬億阿樓那香。香氣普熏其味甘美。百萬億能開悟香普偏一切。令其聞者諸根寂靜。復有百萬億無比香王香種種莊嚴。

疏 阿樓那者。此云紅赤色。

○第八二十句。雨雲爲嚴

雨百萬億天華雲。雨百萬億天香雲。雨百萬億天末
香雲。雨百萬億天拘蘇摩華雲。雨百萬億天波頭摩
華雲。雨百萬億天優鉢羅華雲。雨百萬億天拘物頭

華雲雨百萬億天芬陀利華雲雨百萬億天曼陀羅華雲雨百萬億一切天華雲雨百萬億天衣雲雨百萬億摩尼寶雲雨百萬億天蓋雲雨百萬億天旛雲雨百萬億天冠雲雨百萬億天莊嚴具雲雨百萬億天寶鬢雲雨百萬億天寶瓔珞雲雨百萬億天栴檀香雲雨百萬億天沉水香雲

○第九四十八句座外四面嚴

建百萬億寶幢懸百萬億寶旛垂百萬億寶繒帶然百萬億香鑪布百萬億寶鬢持百萬億寶扇執百萬億寶拂懸百萬億寶鈴網微風吹動出妙音聲百萬

億寶欄楯周匝圍繞。百萬億寶多羅樹次第行列。百萬億妙寶窟牖綺麗莊嚴。百萬億寶樹周匝垂陰。百萬億樓閣延袤綺飾。百萬億寶門垂布瓔珞。百萬億金鈴出妙音聲。百萬億吉祥相瓔珞嚴淨垂下。百萬億寶悉底迦能除衆惡。百萬億金藏金縷織成。百萬億寶蓋衆寶爲竿執持行列。百萬億一切寶莊嚴具網間錯莊嚴。

百萬億光明寶放種種光。百萬億光明周徧照耀。百萬億日藏輪。百萬億月藏輪。並無量色寶之所集成。百萬億香燄光明映徹。百萬億蓮華藏開敷鮮榮。百

萬億寶網。百萬億華網。百萬億香網。彌覆其上。

百萬億天寶衣。百萬億天青色衣。百萬億天黃色衣。
百萬億天赤色衣。百萬億天奇妙色衣。百萬億天種
種寶奇妙衣。百萬億種種香熏衣。百萬億一切寶所
成衣。百萬億鮮白衣。悉善敷布見者歡喜。

百萬億天鈴幢。百萬億金網幢。出微妙音。百萬億天
繒幢。衆彩具足。百萬億香幢。垂布香網。百萬億華幢
雨。一切華。百萬億天衣幢。懸布妙衣。百萬億天摩尼
寶幢。衆寶莊嚴。百萬億天莊嚴具幢。衆具校飾。百萬
億天鬘幢。種種華鬘四面行布。百萬億天蓋幢。寶鈴

和鳴聞皆歡喜

疏於中有四。初二二十句。雜雜莊嚴。羅列座側。言樓閣延袤者。靜法云云。梵云補莫迦。此云帳譽。若是樓閣。應云微麼囊。卽不爾者。譯之誤也。此或應爾。前文已有樓閣故。若重辨者。亦無大失。寶悉底迦者。具云塞縛悉底迦。此云有樂。若見此相。必獲安樂。其形如萬字。具於音義。今寶形似此。二光明寶下。九句光明嚴。言網覆者。若世之燈。以護夕蟲。成隱暎故。三天寶衣下九句。寶衣敷布嚴。四天鈴幢下十句。寶幢行列嚴。

○第十辨音聲嚴

百萬億天螺出妙音聲。百萬億天鼓出大音聲。百萬億天笙簧出微妙音。百萬億天牟陀羅出大妙音。百萬億天諸雜樂同時俱奏。百萬億天自在樂出妙音聲。其聲普偏一切佛刹。百萬億天變化樂其聲如響。普應一切。百萬億天鼓因於撫擊而出妙音。百萬億天如意樂自然出聲音節相和。百萬億天諸雜樂出妙音聲滅諸煩惱。

百萬億悅意音讚歎供養。百萬億廣大音讚歎承事。百萬億甚深音讚歎修行。百萬億衆妙音歎佛業果。

百萬億微細音歎如實理。百萬億無障礙真實音歎
佛本行。百萬億清淨音讚歎過去供養諸佛。百萬億
法門音讚歎諸佛最勝無畏。百萬億無量音歎諸菩
薩功德無盡。百萬億菩薩地音讚歎開不一切菩薩
地相應行。百萬億無斷絕音歎佛功德無有斷絕。
百萬億隨順音讚歎稱揚見佛之行。百萬億甚深法
音讚歎一切法無礙智相應理。百萬億廣大音。其音
充滿一切佛刹。百萬億無礙清淨音。隨其心樂悉令
歡喜。百萬億不住三界音。令其聞者深入法性。百萬
億歡喜音。令其聞者心無障礙深信恭敬。百萬億佛

境界音。隨所出聲。悉能開示一切法義。百萬億陀羅尼音。善宣一切法句。差別決了。如來秘密之藏。百萬憶一切法音。其音和暢。克諧衆樂。

疏於中一二初十句。樂音嚴。後悅意音。下二十句。法

音嚴。前中云牟陀羅者。此云鋒鼓。謂天樂初奏。此鼓先作。故後法音嚴中。初十一句。讚歎三寶。後隨順音下九句。說法益物。別明體用。中初廣自體。竟

論大要言。凡隨智。隨行。隨慈。隨悲。隨波羅密。隨觀昭。隨助道法。隨大願。所有報境。因果相似。今將此業果。將法表之。綱表理智。行教。樓閣表觀智。殿表

正智利生。宮表含育無限座表普印法空悲智萬行。帳表隨根含攝衆生。鈴表法音和悅。華表道眼開敷。亦表行華資果。十百千萬億都該大數無限。但隨法准而知之。可見不煩更釋。

○大文第二廣前殊特者。前文畧云見者無厭。亦已畧明益相。今廣顯之。卽座之德用。恭敬供養復顯爲嚴。文分爲二。初明獲益。後申供義。前中有三十九句。曲分爲四。初十約位辨益。

有百萬億初發心菩薩。纔見此座。倍更增長一切智心。百萬億治地菩薩。心淨歡喜。百萬億修行菩薩悟

解清淨。百萬億生貴菩薩。住勝志樂。百萬億方便具足菩薩。起大乘行。百萬億正心住菩薩。勤修一切菩薩道。百萬億不退菩薩。淨修一切菩薩地。百萬億童真菩薩。得一切菩薩三昧光明。百萬億法王子菩薩。入不思議諸佛境界。百萬億灌頂菩薩。能現無量如來十力。

○二有十二句雜辨得益

百萬億菩薩得自在神通。百萬億菩薩生清淨解。百萬億菩薩心生愛樂。百萬億菩薩深信不壞。百萬億菩薩勢力廣大。百萬億菩薩名稱增長。百萬億菩薩

演說法義令智決定。百萬億菩薩正念不亂。百萬億菩薩生決定智。百萬億菩薩得聞持力持一切佛法。百萬億菩薩出生無量廣大覺解。百萬億菩薩安住信根。

○三十句約行辨益

百萬億菩薩得檀波羅密。能一切施。百萬億菩薩得尸波羅密。具持衆戒。百萬億菩薩得忍波羅密。心不妄動。悉能忍受一切佛法。百萬億菩薩得精進波羅密。能行無量出離精進。百萬億菩薩得禪波羅密。具足無量禪定光明。百萬億菩薩得般若波羅密。智慧。

光明能普照耀。百萬億菩薩成就大願。悉皆清淨。百萬億菩薩得智慧燈明照法門。百萬億菩薩爲十方諸佛法光所照。百萬億菩薩周徧十方演離癡法。

○四七句約大用辨益

百萬億菩薩普入一切諸佛刹土。百萬億菩薩法身隨到一切佛國。百萬億菩薩得佛音聲能廣開悟。百萬億菩薩得出生一切智方便。百萬億菩薩得成就一切法門。百萬億菩薩成就法智。猶如寶幢能普顯示一切佛法。百萬億菩薩能悉示現如來境界。

疏後三段通諸位。或可第二段明廻向。第三段明

十行。第四段明十地。或唯約十住。通別無礙。

可第
或

二明迴向者。以初約位是十住。三明十度。全同十行故。二配迴向。四配十地。則暨位具足。以第二段中神通不壞等。亦有迴向意。第四段皆入佛刹等。亦有十地體勢。故爲此配。由二三前却。二四不顯。故前正釋。後三通諸位。

○二明供義。文分爲五。初十七句。雜明八部人天

菩薩三業設敬

百萬億諸天王恭敬禮拜。百萬億龍王諦觀無厭。百萬億夜叉王頂上合掌。百萬億乾闥婆王起淨信心。百萬億阿脩羅王斷憍慢意。百萬億迦樓羅王口銜繒帶。百萬億緊那羅王歡喜踊躍。百萬億摩睺羅伽

王歡喜瞻仰。百萬億世王稽首作禮。百萬億忉利天王瞻仰不瞬。百萬億夜摩天王歡喜讚歎。百萬億兜率天王布身作禮。百萬億化樂天王頭頂禮敬。百萬億他化天王恭敬合掌。百萬億梵天王一心觀察。百萬億摩醯首羅天王恭敬供養。百萬億菩薩發聲讚歎。

疏

其中所作各隨類所宜

○二三十六句唯明諸天三業敬養

百萬億天女專心供養。百萬億同願天踊躍歡喜。百萬億徃昔同住天妙聲稱讚。百萬億梵身天布身敬

禮。百萬億梵輔天合掌於頂。百萬億梵衆天圍繞侍衛。百萬億大梵天讚歎稱揚無量功德。百萬億光天五體投地。百萬億少光天宣揚讚歎佛世難值。百萬億無量光天遙向佛禮。百萬億光音天讚歎如來甚難得見。百萬億淨天與宮殿俱而來詣此。百萬億少淨天以清淨心稽首作禮。百萬億無量淨天願欲見佛投身而下。百萬億偏淨天恭敬尊重親近供養。百萬億廣天念昔善根。百萬億少廣天於如來所生希有想。百萬億無量廣天決定尊重生諸善業。百萬億廣果天曲躬恭敬。百萬億無煩天信根堅固恭敬禮。

拜百萬億無熱天合掌念佛情無厭足。百萬億善見天頭面作禮。百萬億善現天念供養佛心無懈歇。百萬億阿迦尼吒天恭敬頂禮。百萬億種種天皆大歡喜發聲讚歎。百萬億諸天各善思惟而爲莊嚴。

疏初之三句卽欲界天色究竟後復言種種天者。或通無色。或總上諸類。善思惟亦通諸類。

○三有十二句明菩薩事供養

百萬億菩薩天護持佛座莊嚴不絕。百萬億華手菩薩雨一切華。百萬億香手菩薩雨一切香。百萬億鬘手菩薩雨一切鬘。百萬億末香手菩薩雨一切末香。

百萬億塗香手菩薩雨一切塗香。百萬億衣手菩薩雨一切衣。百萬億蓋手菩薩雨一切蓋。百萬億幢手菩薩雨一切幢。百萬億旛手菩薩雨一切旛。百萬億寶手菩薩雨一切寶。百萬億莊嚴手菩薩雨一切莊嚴具。

○四四句諸天身供養

百萬億諸天子從天宮出至於座所。百萬億諸天子以淨信心并宮殿俱。百萬億生貴天子以身持座。百萬億灌頂天子舉身持座。

○五菩薩修法供養亦明得益

百萬億思惟菩薩恭敬思惟。百萬億生貴菩薩發清淨心。百萬億菩薩諸根悅樂。百萬億菩薩深心清淨。百萬億菩薩信解清淨。百萬億菩薩諸業清淨。百萬億菩薩受生自在。百萬億菩薩法光照耀。百萬億菩薩成就於地。百萬億菩薩善能教化一切衆生。

疏菩薩多明得益。諸天但說供養者。諸天供養是益因故。諸天得益。卽菩薩故。上申供合前獲益。

大文廣前殊特竟

○第三廣前因深

百萬億善根所生。百萬億諸佛護持。百萬億福德所

圓滿。百萬億殊勝心所清淨。百萬億大願所嚴潔。百萬億善行所生起。百萬億善法所堅固。百萬億神力所示現。百萬億功德所成就。百萬億讚歎法而以讚歎。

疏十句可知。所以此會嚴事偏多者。一此天多以補處爲王故。二賢位已極。大悲普周故。所以十住無菩薩嚴表。凡入位故。夜摩卽有。已入位故。然亦未廣而此勝相皆是如來海印所現法界差別自在實德人法無礙依正渾融之嚴事也。

上廣因相。合前先一方嚴處竟。

○第二結通十方

如此世界兜率天王奉爲如來敷置高座。一切世界
兜率天王悉爲於佛。如是敷座。如是莊嚴。如是儀則。
如是信樂。如是心淨。如是欣樂。如是喜悅。如是尊重。
如是而生希有之想。如是踊躍。如是渴仰。悉皆同等。

疏可知。見佛嚴處竟

論如此世界已下至悉皆同等。有五行經明都結
十方同然分。已上徒衆有一百十八種百萬億衆。
已上莊嚴有一百八十四種百萬億莊嚴。菩薩神
天天女色類間襍。或次或不次者。意表此十廻向

位。是以智從悲成大悲海。於人天六道中。以無限
徧周法界行門。一時等化。逐根與法。或次或超。或
住或信。或位階十地。或人天善根。無有一向次第。
安立。以此莊嚴及菩薩神天表法間襍。不依次第。
或菩薩衆有諸天。或諸天衆中有龍神。如是准義
思之。可見經意。問曰。十住但有諸天衆來迎世尊。
十行徒衆卽有諸天及菩薩衆。此會何故八部王
衆。大衆廣傳莊嚴。色類甚多。十地中不敘致天王
及衆來迎入殿莊嚴高座等事。何意其位高升。不
陳廣供。答曰。十住有天。無菩薩來迎。如來所施供

養者爲十住位。且明其初生佛智慧家。未有先見道者。但列諸天。未有菩薩。爲初始從信位。凡夫。未得入聖位故。以此初升須彌頂品。不列菩薩之衆。但有諸天奉迎如來故。明從此位方入聖流。如升夜摩天宮品。卽有諸天及菩薩衆稱揚讚歎者。卽明十住位。已有見道入位故。十行位升進中。卽有諸菩薩衆而迎佛。會入十行法門。以十住十行。設行衆行。出世心多。處世大悲。猶未自在故。所以衆不圓滿。如此兜率天宮諸天菩薩。及莊嚴色類多者。明此廻向之門。會融悲智。出世與世間一體成

就大悲普育含識。徧周利物。不棄微生。是故天王。
龍王。八部諸王。菩薩法王。其衆無量。莊嚴境界。色
相無邊。表明悲位。含弘濟生。無限利物。廣大獲益。
無窮。是故此天莊嚴廣大。如十地之位。但約此十
廻向大悲之際。智育遐周之門。長養大悲。使令堅
厚。更無餘法。別有進求。設復智有奇途。只是此位
之中微細。是故佛升他化。更不別有徒衆承迎。座
體進修。不論別加層級。可知。

○第四迎佛興供。於中二。先將迎興供。一見佛興
供。今初

爾時兜率天王爲如來敷置座已。心生尊重。與十萬億阿僧祇兜率天子奉迎如來。以清淨心雨阿僧祇色華雲雨。不思議色香雲雨。種種色曼雲雨。廣大清淨栴檀雲雨。無量種種蓋雲雨。細妙天衣雲雨。無邊衆妙寶雲雨。天莊嚴具雲雨。無量種種燒香雲雨。一切栴檀沉水堅固末香雲。諸天子衆各從其身出此諸雲。時百千億阿僧祇兜率天子及餘在會諸天子衆。大歡喜恭敬頂禮。阿僧祇天女踊躍欣慕諦觀如來。兜率宮中不可說諸菩薩衆住虛空中。精勤一心以出過諸天諸供養具供養於佛。恭敬作禮。阿僧

祇音樂。一時同奏。

疏前中二初奉迎。一以清淨下。興供於中先諸天。興供皆從身出者。非唯顯諸天福力。亦表身爲供具。供自心生。後兜率宮下。菩薩興供可知。

論爾時兜率天王已下。至音樂一時同奏一段經。明兜率天王爲佛敷座已。與諸天衆。以淨心興供養雲。及諸菩薩奉迎如來分。釋義云。與十萬億阿僧祇兜率天子奉迎如來有二義。一請佛入宮殿。二表法。以解脫無依住之大智。處一切生處。饒益衆生。卽迎佛義。又一釋。如創入聖位。以方便三昧。

而入真門。如此十廻向。以取十住十行中無垢正智。入大悲方便。爲迎佛入宮殿。如三乘中地前三十心爲方便。十地見道。如此經。十信心爲方便。資糧。十住初心。爲見道成佛。十行。十廻向。十地。十一地。爲資糧。資糧十住初正見心成。令慣習自在故。爲三乘教於三僧祇劫方成佛故。設十地菩薩得三種意生身。非是得佛智生身故。以是十地向前三賢菩薩是資糧位。十地見道爲加行位。十一地等覺位中。普賢行方終。十二地是妙覺佛果。此佛華嚴。其義先佛而後行。以先覺佛果。方以悲願之。

行用資覺體。使悲智齊均。以此義故。號佛華嚴也。是故今此兜率天王。以將大悲之方便。用資十住。十行之中。大智佛果爲迎佛義故。夫法無始終。一念齊等。萬行悲智。當體圓終。設教名言。不可竝立。名詮敘致。似有前後義生。體名者。名無始末。達教者。境智不移。此教意明混今古之爲一際。破情塵於當卽也。終不可作延促解。始終見總。不出無時之理。和會一多差別之門也。凡以前位向後位爲遙見。正契爲佛來入宮。以清淨心。雨阿僧祇色華雲。有二義。一供佛。二表法。明大悲萬行徧周其雲。

具十種明法行圓滿。皆從天身出者。明智身興萬行也。大衆天子天女歡喜頂禮者。明以軌度法則利生。令得樂故。明菩薩大悲。令衆生得樂。是菩薩樂故。如世人母。其子樂者。其母樂也。兜率宮中。不可說諸菩薩住虛空中。精勤一心供養出過天者。明以法空成行。出勝世間有爲行也。

○第二見佛興供中二。先諸天後百千億那由他先住下。明菩薩前中三。初明承力見佛

爾時如來威神力故。徃昔善根之所流故。不可思議自在力故。兜率宮中一切諸天及諸天女皆遙見佛。

如對目前

疏一現佛神力。二宿善力。三法門力。

○二慶遇奉迎

同興念言。如來出世。難可值遇。我今得見。具一切智。於法無礙。正等覺者。如是思惟。如是觀察。與諸衆會。悉共同時奉迎。如來。

○三正明興供。於中三初十句。衣盛供以散佛。

各以天衣。盛一切華。盛一切香。盛一切寶。盛一切莊嚴具。盛一切天栴檀末香。盛一切天沉水末香。盛一切天妙寶末香。盛一切天香華。盛一切天曼陀羅華。

悉以奉散供養於佛

疏表修寂滅。以趣果故。

○二十句明起心。雨供嚴空。

百千億那由他阿僧祇兜率陀天子住虛空中。咸於佛所。起智慧境界心。燒一切香。香氣成雲莊嚴虛空。又於佛所。起歡喜心。雨一切天華雲莊嚴虛空。又於佛所。起尊重心。雨一切天蓋雲莊嚴虛空。又於佛所。起供養心。散一切天曼雲莊嚴虛空。又於佛所。生信解心。布阿僧祇金網彌覆虛空。一切寶鈴常出妙音。又於佛所。生最勝福田心。以阿僧祇帳莊嚴虛空。雨

一切瓔珞雲無有斷絕。又於佛所生深信心。以阿僧祇諸天宮殿莊嚴虛空。一切天樂出微妙音。又於佛所生最勝難遇心。以阿僧祇種種色天衣雲莊嚴虛空。雨於無比種種妙衣。又於佛所生無量歡喜踊躍心。以阿僧祇諸天寶冠莊嚴虛空。雨無量天冠廣大成雲。又於佛所起歡喜心。以阿僧祇種種色寶莊嚴虛空。雨一切瓔珞雲無有斷絕。

疏雨供嚴空顯所修萬行稱法性空空有無礙是

嚴空義

○三九句雜申供養

百千億那由他阿僧祇天子。咸於佛所生淨信心。散無數種種色天華。然無數種種色天香。供養如來。又於佛所起大莊嚴變化心。持無數種種色天栴檀末香。奉散如來。又於佛所起歡喜踊躍心。持無數種種色蓋。隨逐如來。又於佛所起增上心。持無數種種色天寶衣敷布道路。供養如來。又於佛所起清淨心。持無數種種色天寶幢。奉迎如來。又於佛所起增上歡喜心。持無數種種色天莊嚴具。供養如來。又於佛所生不壞信心。持無數天寶鬘。供養如來。又於佛所生無比歡喜心。持無數種種色天寶幡。供養如來。百千

億那由他阿僧祇諸天子。以調順寂靜無放逸心持無數種種色天樂出妙音聲供養如來

疏雜申供養表萬行雜修故調順寂靜無放逸心。

應分爲二則有十句

○第二菩薩與供中二先明行成依報供後其諸菩薩下身出正報供前中二十七句文分爲三初十句多因成多果之供次八句一因成一果供後九句一因成多果供今初

百千億那由他不可說先住兜率宮諸菩薩衆以從超過三界法所生離諸煩惱行所生周徧無礙心所

生甚深方便法所生。無量廣大智所生。堅固清淨信所增長。不思議善根所生起。阿僧祇善巧變化所成就。供養佛心之所現。無作法門之所印。出過諸天諸供養具。供養於佛。

疏應有四句。由多因成一果。攝在初段。以多因能一一成故。又初段卽一切中有一。及一切中有一切。次段卽一中一。後段卽一中一切也。今初十句。一時併舉多因。後通成諸供。出過諸天者。勝故。多故。餘可知。

○第二因一果

以從波羅密所生一切寶蓋。於一切佛境界清淨解所生一切華帳。無生法忍所生一切衣。入金剛法無礙心所生一切鈴網。解一切法如幻心所生一切堅固香。周徧一切佛境界如來座心所生一切佛衆寶妙座。供養佛不懈心所生一切寶幢。解諸法如夢歡喜心所生佛所住一切寶宮殿。

疏一因一果中皆因果相似。一蓋以障塵。若度能除蔽。二帳以庇蔭。若悲爲佛境。華以開敷。如覺解清淨。三法忍和悅用嚴法身。四演教網。則震金剛之妙音。觀教網。則不礙文而見理。五香氣聞而不

可見。見而不可攬。猶幻法見而不可取。取而不可得。知幻無堅。以成堅法。六周徧法空。是佛智身所依之境。座之義也。七摧懈慢幢。樹法勝幢故。八諸法如夢。是佛棲託之所也。

○第三一因多果供

無著善根。無生善根。所生一切寶蓮華雲。一切堅固香雲。一切無邊色華雲。一切種種色妙衣雲。一切無邊清淨栴檀香雲。一切妙莊嚴寶蓋雲。一切燒香雲。一切妙鬘雲。一切清淨莊嚴具雲。皆徧法界出過諸天供養之具。供養於佛。

疏無著無生。但是一義。無生約理。無著約智。此二契合。方成一因。文中九句可知。

○第二身出正報供

其諸菩薩。一身各出不可說百千億那由他菩薩。皆充滿法界虛空界。其心等於三世諸佛。以從無顛倒法所起。無量如來力所加。開示衆生安隱之道。具足不可說名味句。普入無量法。一切陀羅尼種中生。不可窮盡辯才之藏。心無所畏。生大歡喜。以不可說無量無盡如實讚歎法。讚歎如來無有厭足。

疏正報供中。文有十句。初二明現身德量。謂一一

量周法界。德齊佛故。次以從下三句。明勝辨之因。
次具足下四句。顯勝辨所依。後以不可下一句。正
申辨讚。皆從總持辨藏之所流故。情動於中。故形
於言。言猶不足。敬之至也。

上菩薩興供。合前諸天迎佛興供科竟。

○第五覩佛勝德。分二。先明覩佛身雲勝德。後爾
時如來大悲下。明現勝德之意。前中分二。初覩
勝德。後時彼大眾咸見下。見佛光用。前通十眼
所見。後約天眼所見。今初也。然此經文次第。具
顯如來二十一種殊勝功德。以文言浩汗。致古

釋同迷。然離世間品。雖具二十一句。而此文義兼廣。故隨便引於諸論。文分爲三。初總觀如來。次別觀德相。三結成觀解。鈔而此文義兼廣者。有名無釋。今文有釋無名。四紙餘經。次第具釋二十一德。故云文義兼廣。四紙餘經。文廣其中。句義該收諸論。異釋無遺。故云義廣。由此故於此中引於諸論。將論釋經。將經證論。故云隨便。古人亦引諸論在離世間。既無經文論。無憑據。由此無名。故古德同迷。賢首以下總結十句。分爲十段。刊定以十六三業配之。並如下引。今竝不用。離世間品。歎佛有名者。謂玅悟皆滿二行。永絕達無相法。住於佛住。得佛平等。到無障處。不可轉法所行。無礙立不思議。普見三世。身相充徧。一切國土。智悟明達。一切諸法。了切行。盡一切疑。無能測身。一切菩薩等所求智。到佛無中。邊佛平等。地盡於法界。等虛空界。

爾時一切諸天及諸菩薩衆見於如來應正等覺不可思議人中之雄

疏今初畧舉三德以顯一雄。一者如來。二言應者。卽是應供。三正等覺卽正徧知。此一應字亦通屬下隨應覺故。此卽總句。離世間品名妙悟皆滿。佛地攝論皆名最清淨覺。親光釋云。謂佛世尊。普於一切有爲無爲所應覺境。正開覺故。此釋正義。揀異邪覺。又於一切所應覺境。淨妙圓滿。正開覺故。此釋最清淨義。亦明覺滿揀異菩薩。又於一切如所有性盡所有性。正開覺故。此釋符今等字。謂雙

照二諦。平等覺故。亦是徧義。故云正徧知。本論節
攝論
無著所造。世親無性。二俱有釋。唐三藏俱譯。皆有
十卷。其盡所有。唯是世諦。其如所有通於二諦。則
顯如來自相共相。若教所說。若法本性。無不證知。
如實覺故。疏中但云雙照二諦。平等覺故。然二諦
平等。則二性無碍。無所不
收。既無不知。卽是徧義。

○第二別觀德相。二十一德。分二十段。後二合故。
然攝論中二十一德。通有三節。一先列經二十
一句。二無著菩薩立功德名。以爲解釋。三無性
等。但釋論名。以符經旨。今各句句配屬。其佛地
論釋。有同攝論。有異攝論。異者引之。今初明不
二現行經也。卽觀察如來一向無障轉功德。此

是無著立名。他皆倣此。

鈔今各句句配屬者。以論中三節各一時併舉。

謂第一列經二十一句。第二本論一時立二十
一德之名。第三釋論次第一時牒釋。故今各配

摘成二十段疏中文各有二。先釋名義後釋經
文。今初不二現行。先釋名義中。具指經論及釋
三段可知。但無性釋論中。先牒本論功德之名。
後方指經。如此段云。謂於所知一向無障轉功
德者。此卽開示不二現行。下皆準此。世親則先
牒經。今疏皆先牒經。後引本論立名。故釋名義
中。且分爲二。一牒經立名。二引釋論釋。初中其
卽觀察如來五字。是疏義加順於此經觀佛德
故餘皆是
彼論文

其身無量不可稱數。現不思議種種神變。令無數衆
生心大歡喜。普偏一切虛空界。一切法界。以佛莊嚴
而爲莊嚴。令一切衆生安住善根。示現無量諸佛神

力。超過一切諸語言道。諸大菩薩所共欽敬。隨所應化。皆令歡喜。住於諸佛廣大之身。功德善根悉已清淨。色相第一無能映奪。

疏今初不二現行。先牒經立名。文中分二。初廣顯利樂。明離所知故。不同二乘。二住於下。結成所住。彰離煩惱。不同凡夫。前中三。初明應廣順機。令喜。二普偏下。明其偏應。定慧莊嚴。生物善根。三示現下。彰應用深廣。雖超諸言而無遺曲濟。一結成所住者。初句明智住法身。能住所住。一俱廣大。下句心無煩惱。善根清淨。色相超倫。具上二義。名清淨。

覺他皆倣此。

「鈔能住所住俱廣大者所住卽法界。法身徧一切處故廣大。智稱法身等。」

彼眞性如日光含空具上二義下結歸總句兼例下文

○第二明趣無相法。卽觀察如來。於有無無二相。真如最勝清淨能入功德。無性云。爲明斷德。故次說之。不住生死涅槃相故。卽無住涅槃。然無相法。卽是清淨真如。趣謂趣入。謂此真如。諸法無性以爲相故。非是有相。體卽圓成。自相有故。非是無相。此二不相離。名無二相。諸法中勝。故名最勝。遠離客塵。故名清淨。旣自能入。亦令他人爲最清淨。自入則不住生死。他入則不住涅槃。

槃。

智慧境界不可窮盡。無比三昧之所出生。其身無際。
徧住一切衆生身中。令無量衆生皆大歡喜。令一切
智種性不斷。

疏文中先明白入。後明他入。今初先明不住生死。
智稱如境。皆不可盡。無比三昧。令智出生。又令真
如出二障故。一其身下。明不住涅槃。同體大悲。徧
住物身。心真如性。物物徧故。一令無量下。辨令他
入。一則大悲冥熏。二則大智爲說。令於身中。見如
來性。成一切智故。種性不斷。是入義也。此用常寂。

名爲涅槃。

鈔偏住物身者。如有偈云。我今解了如來性。如來今在我身中。我與如來無差

別。如來卽是我真如

○第三明住於佛住。卽觀察如來無功用佛事不
休息功德。爲欲得上無住涅槃。故次明之。

住於諸佛究竟所住。生於三世諸佛之家。令不可數
衆生信解清淨。令一切菩薩智慧成就。諸根悅豫。法
雲普覆虛空法界。教化調伏無有遺餘。隨衆生心悉
令滿足。令其安住無分別智。出過一切衆生之上。

疏 文中初明所住。後彰住益。今初言佛住者。謂聖
天梵等。皆佛所住。而於性空大悲。偏善安住。大悲

性空。卽是佛家。故能不住生死涅槃爲究竟住。此卽恩德。是以親光亦名爲觀所化功德。常住大悲。晝夜六時觀世間故。後令不可下。彰住家益。初明由住大悲。故能益物無遺。是不休息義。由住性空。自無功用。故能令物住無分別。出過衆生。總顯勝也。鈔文中下。釋文爲二。從多而言。前段卽釋經。後段卽釋論。在文易了。而取論意。若具引釋論者。無性論云。謂不作功用於諸佛事。有情等中。能無間斷。隨其所應。恒正安住聖天梵住。非如聲聞。要作功用方能成辦。利有情事。非如外道。雖有所住。而非殊勝。天住。謂四種靜處梵住。卽是悲等無量處。性空也。謂此住中。常作佛事。無有休息。大悲故也。今用二論。以釋經文。大悲性空者。大悲是利他家。性空是自利家。故法華經明大悲爲室。淨名云。

畢竟空寂舍。況二相導。真實家也。故雙安位。故能不往下。卽上大悲般若所輔翼。故

○第四明逮得一切佛平等性。下云。得佛平等。卽觀察如來。於法身中所依意樂。作事無差別功德。如上佛住。爲共不共。故次明之。此一切諸佛。展轉和雜而同住故。一切諸佛三事無差。非如聲聞。但有所依。

獲一切智。放大光明。宿世善根。皆令顯現。普使一切發廣大心。令一切衆生安住。普賢不可壞智。偏住一切衆生國土。從於不退正法中生。住於一切平等法界。明了衆生心之所宜。現不可說。不可說種種差别。

如來之身。非世言詞而歎可盡。能令一切常思念佛。充滿法界廣度羣生。隨初發心所欲利益以法惠施。令其調伏信解清淨。示現色身不可思議。

疏文卽分三。初明所依無差別。謂一切智。以一切諸佛皆依真如清淨智故。放大光下。顯智之用。二普使已下。明意樂無差。謂同有利樂勝意樂故。普使之言。卽意樂也。不可壞智。卽如來藏。皆賢菩薩自體偏故。染而不染。名不可壞。反源照極。故名安住。三偏住下。作業無差。一切皆作受用變化利他事故。於中先明作業周偏次從於下。作業所依。卽

自受用身。一受不失。名爲不退。謂得法性。卽念不退。此後親生佛智。此智生已。還住法界。次明了已下。正顯作業。初觀機。後現不可說下。作業受用。變化各有多類。名不可說。差別之身。能令已下。彰業之益。一能益他。二隨初下。滿本所願。亦令於物能現色身。此上四段。明其自利。後十七段。明其利他。

○第五明到無障處。卽觀察如來修一切障對治功德。利他之中。先明化障對治。故次明之。謂已慣習一切煩惱及所知障對治聖道。卽一切智及定自在性。故論名爲修治。又已到永離一切

習氣所依趣處。經名到無障處。二文互顯。以有治必無障。無障由有治故。

等觀衆生心無所著。住無礙。住得佛十力。無所障礙。心常寂定。未曾散亂。住一切智。

疏 文中心無所著。是無煩惱障。住無礙。住明。無所知障。得佛十力。卽是種智。是所知障治。心常寂定。住一切智。卽煩惱障治。

白

龍巖

弟子傳脩

齋傳啓

醴興

壽醴

一

生

一仁

一信

一忍

已上

各伍

錢法

信醴

法

汝鑑

信士周

太恩

醴同刻

華嚴

經鑑

升兜率天

宮品

疏論

纂要

第四

十四

卷伏願

衆等

樞金剛種

修普賢行

仰報

四恩

普資

三有

日

華藏室

謹題

康熙二十二年九月

大方廣佛華嚴經疏論纂要卷第四十四